

Inaugurazio ekitaldia

Ura, sua... Freeman


*Atleta aborigenak piztu zuen atzo Sydneyn olinpiarugarra, irekiera ekitaldi ikusgarriaren bukaera ederrean*Imanol Murua Uria / Sydney
berriemalle berezia

CATHY FREEMAN atleta aborigenak piztu zuen azkenean Sydneyko Olinpiar Jokoetakougarra, irekiera ekitaldi ikusgarriaren bukaera ederrean. Freemanen aurretik beste sei emakumek eraman zuten suzia estadio barruan, emakumek jokoetan lehenengoz parte hartu zutenetik ehun urte bete direla ospatzeko. Kirolarien desfilearen aurreko ikuskizunean, Australiaren naturaren eta historiaren erakustaldia egin zuten, 12.600 lagunak parte hartzearekin.

Debbie Flintoff-King atletaren neskutik hartu zuen sua Freemanek, gaueko hamaikak pasata zirenean. Estadioa lepo betetzen zuten 110.000 lagunak zutik eta txaloka zeudela, ur jauzi bat ireki zen ustekabeazugarra piztekoa zen lekuan. Ur putzuan sartu zen eta uretara zuzendu zuen suzia. Urak su hartu zuela ematen zuen. Urez betetako plataformak, sutan, gora egin zuen, alboetatik ura erortzen ari zela. Horrela piztu zuen Freemanek 27. Olinpiar Jokoetako sua.

Herri aborigenari keinua izan zenugarra piztearen ohorea Freemani eman izana. Juan Antonio Samaranch Nazioarteko Olinpiar Batzordeko lehendakariak, gainera, aipamen berezia egin zien Australiako jatorrizko herritarrei. «Australia gaur egun dena —herri handi bat— egin dutenei gure errespetua adierazi nahi diegu, eta ohore berezia egin herri aborigenari eta Torres Straits herriari».

Freemanek ez ezik, suzia estadioan beste sei emakumek eraman izanarekin, berriz, emakumeen parte-hartzea nabarmendu nahi izan zen.



PATRICK HERTZOG / EPA

Cathy Freeman, atzo, Sydneyko olinpiar estadioan,ugarra pizteko unean.

Betty Cuthbert, Raelen Boylek —Cuthberten aulki gurduna bultzatzen—, Dawn Fraser, Shirley Strickland De la Hunty, Shane Gould eta Debbie Flintoff-King kirolari australiarrek —Jokoetan historia egindakoak guztiak— eraman zuten sua Freemanengana.

Une hunkigarri gehiago ere izan zen. Aurkezleak Ekialdeko Timorko taldearen sarrera iragarri, Timorko lau kirolariak estadioan agertu eta milaka ikusle zutik jarri eta txaloka hastea bat izan zen. Lau kirolariak —hiru gizonezko, emakumezko bat— olinpiar banderaren atzean joan ziren, horietako bat etengabe dantzatzen. Estadiora sartzen azken bigarrena izan zen Timor, Australiaren aurretik; eta, noski, australiarrentzat izan ziren txalo beroenak. Ikusleei kanguro panpinak jaurtiz erantzun zuten kirolariak.

Kirolarien desfilearen aurreko ikuskizuna Australiako errealitatea erakusteko saio ikusgarria izan zen. 120 zaldunek, olinpiar bandera banarekin aurrea eta australiarrekin gero, gora eta behera zarpigarren zalditeria balira bezala ibili ondoren, estadioa itsaso bilakatu zen aurrea —Nikki Webster neskatoa igerian aritu zen, 50 metroko altueran—, eta lorez bete gero. Aborigenen kantu eta dantzek hartu zuten zelaia atal historikoaren hasieran, eta Cook kapitaina ontzi berezian sartu zen gero, kolonizatzaileei bide egiteko. Dena bat aitzolari ere aritu zen, zutikako enborretan. 12.600 lagunak parte hartu zuten ikuskizunean, sei mila langileren laguntzarekin.

Jokoak, ohi bezala, estatu-buruak ireki zituen ofizialki: Sir William Deane Australiako gobernadore nagusiak.

Korea bat, baina desfilean soilik

Ipar eta Hego Koreak osatutako taldeak jaso zituen atzo txalo handienak, Australiaren eta Eki Timorren ondoren. 'Korea' izenarekin desfilatu zuten, Kenyaren eta Kuwaiten artean. Bandera zuria, Korearen mapa urdina erdian zuela. Beraz, jokoetan 199 estatuk parte hartuko duten arren, desfilean 198 izan ziren.

Erresuma Batuari txalo eta txistu

Harrera bereziki beroa egin zioten Erresuma Batuen ordezkariak handiari. Txaloak batez ere, baina txisturen batzuk ere entzun zituzten ama aberriko kirolariak. Kolonia britainiar izaniko estatuak ordezkariak ere txaloak jaso zituzten, Fidji eta Honk Kongek. Australiar askok arbasoak irlandarrak dituztela ere igarri zen.

Izar batzuk ez ziren izan

Biharamunean lehiaketa zuten kirolari askok ez zuten desfilean parte hartu. Esaterako, australiarren artean Ian Thorpe eta Susie O'Neill igeriketako izarrak falta ziren. Gaur estreinatuko dute igerilekua biek. Euskal kirolari batzu ere falta ziren, hala nola Martin Fiz eta Izaskun Aranburu, oraindik ez baitira Australiara heldu.

Eritrea lehenengo aldiz

Eritreak bandera propioarekin eta Etiopiatik berezita desfilatu zuen, lehen aldiz Olinpiar Joko batzuetan. Ekuatore Ginearen atzetik eta Estoniaren aurretik, Etiopia bera atzean oso hurre zetorrela eman zioten estadioari buelta erdia sei kideek. Ikusle gehienak ez ziren gertakariak jabetu; txalo berezirik ez zioten egin.